


SINBAD SOUL MUSIC FESTIVAL A PONE ARUBA BIRA MAS "HOT HOT"..

Fotos/Texto: Jan Poets

DEN AMBIENTE

** For di diaranson caba na comienso di e diferente actividadnan di Sinbad Soul Music Festival, Aruba a cuminsa ta bira mas "hot hot" cu nunca. Tur e night-clubnan mas conoci y hasta esnan cu recién a habri esta "Sinbad Soul Shack" y "Hit & Run" banda di Hooters y riba di Benihana, ta yen yen tur anochi. No papia mes pa cana riba nos beachnan, pasobra ta trompeca so bo tin chens pa trompeca riba un di e

sweet boom boomnan. Mientrastanto cu ayera nochí mes e soul festival mes a ranca sali den Compleho Deportivo Guillermo P. Trinidad. E interes mas grandi sin duda ta e presentacion di Earth Wind & Fire mayan diadomingo. Awe DEN AMBIENTE ta publica fotonan di e ambiente cu a ser forma riba e dos prome anochinan pa nos bandanan local y tambe Crofire di Barbados.




**** Aki Sinbad ta presenta su mes dilanti e publico durante e actividad riba e parkinglot di Alahambra Casino..**




**** Tremendo mes tabata e presentacion di Taxx To The Maxx..**



**** Claudius Philips & OREO a hinca e publico den un ambiente formal..**



**** Cosnan tabata preta preta y "hot hot" durante e actividad den Sonesta Arena..**



**** Un di e cosnan mas comenta tabata e presencia di e boddysguardnan di Sinbad, kendenan ta kere cu Aruba ta di nan y hasta riba e agentenan policial nan kier pone orde..**

DEN AMBIENTE



**** Crosfire di Barbados aña pasa a ser descubri pa Sinbad aki na Aruba durante nan presentacion na Nanky Country Club hunto cu Claudius & OREO. Dilanti un publico grandi di e bishitantenan, nan a probecha di e oportunidad unico aki pa promove nan pais Barbados den un forma barbaro..**



**** Aruba su beachnan ta carga carga y e banana riba laman ta hayando trabao sin fin..**



**** Durante tur e dianan aki di Sinbad Soul Music Festival, Coleta ta pa su cuenta..diaranson e tabata bisti na tiger, diahuebs na zebra, ayera den stadion Coleta tabata manera yuana, awe e lo ta na girafe y mayan diadomingo si Jeff mester tene ciudado, pasobra Coleta lo ta den style di Earth Wind & Fire..**



**** E publico disfrutando sin fin durante e presentacion di Crosfire..**



**** THE CREATONS tabata master durante nan presentacion. Nan a sorprende tur hende cu nan repertorio hopi bon hinca den otro y e cancion di The**



**** D2U 365 BRASSBAND a pone tur e bishitantenan nan soul sacudi bay off..**



**** Durante Claudius & OREO su presentacion, e bishitantenan a sera conoci cu e "Saca e boem" y tambe e "Dunky Ride", cualnan a ser gusta masha hopi mes pa e bishitantenan.**

STAR PROMOTION MESTER CUMINSA REALIZA CU NAN SO NO POR..

E promocion pa Aruba na Hawaii a laga hopi di desea..

Fotos y texto: Jan Poets.

DEN AMBIENTE



** Si tabata tin un cos cu a molestia DEN AMBIENTE hopi durante e certamen di Miss Universe na Honolulu, Hawaii, tabata e falta di material pa promove Aruba su candidata Wendy Lacle. DEN AMBIENTE no por gaña su mes, pero na ningun caminda no a mira nada pero net nada di Wendy Lacle y Aruba, mientras cu por a mira bunita foldernan di e candidatanan di Curacao y Bonaire.

Compara cu e cinco certamenan cu DEN AMBIENTE a yega di cubri, e biaha aki Aruba no tabata ni sombra pa loke DEN AMBIENTE a yega di experiencia. Na Mexico na 1993 tempo cu Sra. Rina de Cuba-Mansur y Ronchi de Cuba a apoya Dyane Escalona, tabata e mihor aña cu Aruba a sa di propaganda su mes durante e certamen. Dyane Escalona no tabata tin e suerte di por a cay den e diez finalistanan, pero e nomber di Aruba a keda graba den mente di e mexicanonan y tambe prensa internacional pa e tremendo promocion cu Aruba a haci.

Ta na Mexico Aruba a planta e simiya, pa despues Star Promotion por a disfruta di e frutanan. Ta na Mexico e organizacion di Miss Universe y e otro certamenan a tuma nota di e entusiasmo y interes grandi di Aruba, loke a

pone nan bay pone mas atencion na Aruba, cu hasta Aruba a bin na remarca pa e certamen.

Enves cu Star Promotions a sigui cu e team dinamico cu realmente ta coopera cu alma y cuerpo y cu yen di amor na bienestar di Aruba, Star Promotion a cuminsa distancia nan mes for di nan y a prefera di bay traha den un circuito cera. Star Promotion a prefera di bay traha cu Jaime Arango y no cu Ronchi de Cuba. E suerte di Jaime Arango tabata cu Tarin Mansel na Las Vegas y aki Jaime Arango a haya mas poder den Star Promotion cu te hasta actualmente el a conquista e candidatanan di Curacao y Bonaire. Por a compronde cu pa cada candidata e ta cobra 10 mil dollar. E aña aki el a gana 30 mil dollar sin por a clasifica ningun di su candidatanan.

E pregunta ta awor, ta pa cuanto aña mas Jaime Arango lo sigui cobra nos Miss nan 10 mil dollar pa e preparacion. Francamente bisa e preparacion di 10 mil dollar ta hopi exagara y Atan Lee sa mucho bon di esaki tambe. Nada contra pa Jaime Arango prepara nos Missnan cu su experticio den e trahenan di gala, pa cual por a compronde cu lamentablemente na Aruba esaki ta haci falta serca nos diseñadornan pa loke ta trata e cintura perfecto. Pero pa prepara nos Missnan mentalmente, DEN AMBIENTE no ta kere den esaki.

Un gran parti di e 10 mil dollar aki por ser uza den e parti promocional. Aki na Aruba mes tin hopi profesionalnan cu por prepara nos Missnan mentalmente y siña nan exactamente con pa promove Aruba, pasobra ta esaki ta e trabao primordial di un Miss den un certamen na unda e ta confronta su mes cu prensa internacional.

Ademas ta masha suerte un candidata di un pais chiquito manera Aruba tin pa haya oportunidad pa entrevistanan cu prensa internacional (no peluqueronan y diseñadornan camufla), debi cu ta 81 pais ta participando y prensa

semper ta focus riba paisnan di nomber grandi ya cu logicamente nan mercado ta mas bendible.

Ta pesey mes e parti promocional cu materialnan ta di vital importancia durante e certamen. Na momento cu e candidata ta ocupa cu su compromisonan di ensayo, ta e comision of e periodista su trabao ta pa core un campaña di promocion y pone Aruba su nomber resalta. Paisnan di nomber grandi no mester mucho di e promocionnan aki, debi cu


ya nan ta conoci, pero Aruba si MESTER di esaki, ya cu Aruba ta un pais chiquito den e mundo aki cu ta DEPENDE di e mercado turistico.

Aruba su unico oportunidad pa participa den un competencia mundial ta e certamen di Miss Universe y ta pesey mes Aruba mester probecha di e oportunidad aki cu e parti di promocion. Si Aruba no sali Miss Universe of clasifica, tog mester keda un aire di satisfecho cu Aruba a sa di promove su mes manera

debe ser. DEN AMBIENTE no solamente ta cubri e certamen, pero tambe ta probecha entre e periodistanan y e publico pa laga nan sera mas conoci cu Miss Aruba.

Cu DEN AMBIENTE su experencianan cubriendo cinco certamen di beyeza mundial, DEN AMBIENTE ta despuesto pa coopera cu Star Promotion den e parti preparativo di e campaña promocional otro aña, pasobra realmente esaki a laga hopi di desea..

Durante un entrevista breve cu Donald Trump..
CERTAMEN DI MISS UNIVERSE TA RIBA LISTA PA SER REALIZA AKI NA ARUBA... TA GOBIERNO MESTER CUMPLI CU E OFERTA..



*** Aki por mira e momento cu Hermanito Narvaez y DEN AMBIENTE tabata den entrevista cu Donald Trump. E parti aki a ser graba pa e programa "Hermanito Ta Presenta"...*

** Durante e recien certamen di Miss Universe na Honolulu, Hawaii, e magnate comerciante Donald Trump kende dos aña pasa a tuma henter e organizacion di e certamen di Miss Universe na su encargo, a confoca un rueda di prensa. E interes di parti di e miembran di prensa internacional tabata hopi grandi pa e encuentro aki hunto cu Donald Trump. Cada periodista a haya oportunidad pa lansa nan pregunta na Donald Trump, kende den un forma tranquilo tabata contesta, pero tog tabata corta varios di e periodistanan cu kier a haci mas pregunta. Pues e tabata tene cada periodista hopi limita na nan

preguntanan.

E preguntanan mas interesante tabata na momento cu un periodista a puntre si e mes no ta haya cu e certamen di Miss Universe no ta goza di un popularidad grandi manera añanan anterior, riba cual Donald Trump honestamente a admiti esaki y den e mesun rosea a declara cu nan ta trahando hopi duro pa bolbe pone e imagen di Miss Universe den su luz di popularidad mundialmente.

Un di e preguntanan mas chistoso tabata na momento cu un periodista femenino a puntra Donald Trump, di con el a dicidi di drenta den e negoshi di Miss Universe, riba cual Donald Trump a contesta den un estilo romanti-

co, cu e ta stima muhernan bunita.

DEN AMBIENTE tambe a haya un oportunidad pa haci un pregunta y a probecha di puntra "the man himself" Donald Trump si e posibilidadnan tey pa e certamen di Miss Universe ser realiza aki na Aruba y di con esaki no a tuma lugar aña pasa, riba cual Donald Trump a contesta cu ketu bay Aruba ta un di nan islanan mas favorito, pero cu DEN AMBIENTE mester bay papia cu Gobierno di Aruba pa nan acepta e oferta ideal. DEN AMBIENTE na su turno a puntre pa e oferta ideal, riba cual Donald Trump a contesta cu e mes lo participa esaki na Gobierno di Aruba...

MUY PRONTO "HERMANITO TA PRESENTA" E COBERTURA DI MISS UNIVERSE NA HONOLULU, HAWAII...

Texto y foto: Poets

DEN AMBIENTE



**** E meta di e dream team tabata pa pone mas atencion y apoyo na e tres candidatanan aki, Natacha Bloem di Curacao, Wendy Lacle di Aruba y Uzmin Evertsz di Bonaire.**

**** Pa DEN AMBIENTE** tabata un placer y honor di por a forma parti di e "Dream Team ABC" durante e certamen di Miss Universe na Honolulu, Hawaii, cu Hermanito Narvaez como presentador, Ronald Specht como camaraman y Verna Vasquez ex Miss Curacao y finalista di Miss Universe 1997 como modelo.

Porcierto cu presencia di Verna Vasquez na Honolulu, Hawaii a causa un impacto grandi. Tur caminda e wowonan hawaino tabata di focus riba Verna Vasquez. Den e revista HOLA ARUBA, DEN AMBIENTE lo amplia mas riba e impacto grandi cu Verna Vasquez a causa na Honolulu, Hawaii.

Sin duda cu presencia di e crew di e "Dream Team ABC" durante e certamen di Miss Universe na Honolulu, Hawaii, tur e tres candidatanan a haya nan merecido atencion y apoyo. Tanto Wendy Lacle di Aruba, Uzmin Evertsz di Bonaire y Natacha Bloem di Curacao por a sinti nan mes satisfecho y tranquil na Honolulu, Hawaii, di por sa cu nan tin atencion y cu

nan esfuerzonan pa promove nan pais lo ser transmiti na nan pueblo y cu nan pueblo ta pendiente di nan logronan.


Esaki ta un vitamina di estimulo cu ta pone e candidatanan sinti nan mes contento y ta haya mas animo pa sigui sobresalir den e certamen di Miss Universe. Alcontrario si mira otro paisnan cu no por conta cu e sosten moral aki y mas e dianan ta asercando bo por mira cu claramente nan ta perdiendo animo y ta sac den otro. Ta pa e motibo aki tambe presencia di periodistanan ta sumamente importante pa un candidata.

Pa realiza e viahe super costoso aki, ta na su lugar pa gradici Sr. Rudsel Maduro di American Airlines Curacao, Sr. Alan Maduro di Pepsi Cola Curacao y Sr. Ildo Vrolijk di Ildo's Lottery Aruba. Tambe gradicimento ta bay pa Hernamito Narvaez kende cu su esfuerzo a haci e viahe historico aki posibel.

Keda pendiente pa un programa special di e cobertura aki na Honolulu, Hawaii den e programa di "Hermanito Ta Presenta", cual lo ta muy pronto..




**** Hermanito a uni su dream team na Honolulu, Hawaii, cual muy pronto lo ser pasa a traves di Tele Aruba..**



**** Aki DEN AMBIENTE tabata realiza e entrevista cu nos Miss Aruba Wendy Lacle pa e programa "Hermanito Ta Presenta"...**

HABITANTENAN DI HONOLULU, HAWAII, HOPI PREOCUPA CU NAN PAIS MESTER A PAGA ORGANIZACION DI MISS UNIVERSE 3.5 MILLON DOLLAR..



**** DEN AMBIENTE den pleno entrevista cu NBC News, cual a ser realiza cu un "wireless mike" digital..**

**** E certamen di Miss Universe a costa e ciudad di Honolulu, Hawaii, un capital di 3.5 millon dollar. Esaki DEN AMBIENTE por a compronde for di e presentador di noticia di NBC Hawaii, kende a realiza un entrevista cu tanto Hermanito Narvaez y DEN AMBIENTE.**

E motibo di e entrevista aki ta debi na e preocupacion di e habitantenan di Honolulu, Hawaii, kendenan mester mira cu 3.5 millon dollar for di na impuesto ta ser saca pa paga e organizacion di Miss Universe, pa asina e certamen por a tuma lugar riba nan pais. Den un forma franco y honesto e presentador a bisa nos cu

actualmente Honolulu, Hawaii, ta den un crisis economico, debi cu nan ta depende hopi di e mercado turistico, especificamente e fluho turistico for di Hapon, pero actualmente Hapon mes ta den un crisis economico. E pueblo ta puntra nan mes si ta vale la pena inverti 3.5 millon den e certamen di Miss Universe. Ta pa e motibo aki tambe e presentador a realiza entrestanan cu e diferente periodistanan riba e tema aki.

E presentador a puntra nos como periodista con nos lo bay promove Honolulu, Hawaii. Na prome lugar DEN AMBIENTE a felicita e comunidad di Honolulu, Hawaii,

pa nan bunita pais, pero mas ainda pa nan forma bondadoso y hospitalario, cual ta comun na e cultura di nos pais. E forma cu nos lo bay promove Honolulu, Hawaii, ta cu nos ta cu un equipo di television cu lo ser mira na tres pais, Aruba, Bonaire y Curacao. Tambe cu tur dia nos lo manda repertahenan en vivo pa tres radio emisora, un canal di television y pa e corant mas grandi di Aruba cu ta DIARIO.

Tanto e entrevista di Hermanito y DEN AMBIENTE a ser pasa den e boletin noticiero, cual a ser mira pa tur e islanan di Hawaii y tambe un parti na Estados Unidos.